

Yohane

Ɔwulú Saasi

¹Mí ɔdwepú Gaio, ntɔdwé fú ɔɔkwali amvɔ. Mí ɔpasua ɔhande Yohane dé ɔwulú ánti wanlín sísí fú.

²Mí ɔdwepú, ndehógyiá iwɪ bu fu ɔnlɪn, tógyítɔ é una wankláán fé alía fúde fú Bulu súm. ³Ansí lehié gyi mi bréá apíó aku beba bebláa anɪ alía fude Bulu mbla ámusu gyí, pú alía funa ɔɔkwali ɔkpa ámusu. ⁴Brégyíbréá nonú alía mí abí Akristofɔ buna ɔɔkwali ɔkpa ámusu á, utehié wá mí ansigyí.

Gaio Kanfú

⁵Mí ɔdwepú, utɔ wankláán fúdeɔwe, fúde anɪ apíósú kí, títriu afɔɔ ámu. ⁶Amútɔ aku baba bebláa anɪ ɔpasua ámu alía fekɪ amúsú féé. Bɔ mbódí afusi amú ɔkpa alía íbégyi Bulu ansí é. ⁷Tsúfé Kristo su búna. Bumedeé tɔtɔ hɔɔ tsu ahá ání bumegyí Akristofɔ wá. ⁸Ilehián ání abéki ahá ánti odusu alɪ, fékɪ anɪa amúnyɔ abɔɔwe kule yó ɔɔkwali agyómá ámu.

Diotrefe mua Demetrio

⁹Nawánlín ɔwulú ku sísí mli dodo, táme Diotrefe dékléá ɔɔɔwe mu iwɪ ɔpasua ɔhande. Mú su ɔmedé anɪ pubwé tɔtɔ. ¹⁰Ní nebá mli wá á, nébláa mli mu asɔn laláheá ɔdeblí tsú anɪ iwɪ. Múá uma ale kúráá gyí, ɔbéé, mumɔɔhɔ apíó ámu afɔɔ. Ɔde ahá é itin ka ɔbéé, bumáki amúsú, ɔde ahá ání beki amúsú é gyáa le ɔpasua ámvɔ.

¹¹Mí adwepú, mli mákasí mu bwehé laláhe anɪ. Mboún mlukasí yilé abwepú ámu bwehé. Ɔhagyíɔha ání ɔɔɔwé yilé

á, Bulu mu bi ógyi, táme chá ání ɔ̀ɔ̀ɔ̀wé lalahɛ mú méyín Bulu.

¹²Demetrio mú á, ɔ̀hagyíɔ̀ha tetí mu ɔ̀dayilé. Mu tsiátó é idesuná ání ɔ̀ha wankláán ogyi. Mí é ntetí mu ɔ̀dayilé. Mhɔ̀yin ání mí asun blíhé igyi ɔ̀ɔ̀kwali.

Uklá

¹³Tɛ̀ki asún tsɔ̀tsɔ̀tsɔ̀ bu unvá nébláa fu, táme mmedékléá nówanlín mú sísí fú. ¹⁴Nde ɔ̀kpa kú ání imó̀wa ɔ̀pá kúráá néba mli wá, abétsiá así tóí.

¹⁵Bulu ɔ̀háa fú iwilwii.

Fó anyawíe féé behá fú itsiá. Nehá aní anyawíe amuto okugyíku é itsiá.